


圭齋文集

三



圭齋文集卷之十

墓碑銘

元故中奉大夫江南諸道行御史臺侍御史劉公墓碑銘

至元元年冬十月江南行臺侍御史鐫公未引年拜疏致事歸長沙二年夏四月丁酉薨于私第是年冬十二月以治命葬湘西嶽麓山之原湖南憲使汝南梁公遺既志其藏諸孤奉行實求濶以墓表屬於契家廬陵歐陽玄請文志諸石按公諱宗說字傳之世成都華陽人大父宋末嘗為茶陽軍使因家隣境之攸輿幼侍祖父

速官嶺外既孤適遭宋亡克自樹立從鄉先生趙公并
學于宜春年十二三能屬文有才諳踰弱冠以薦補廣
西憲史再辟湖南貢南臺察院史歲滿調衡州錄事判
官中書刑部辟職官吏皆未赴臺除廣西憲司照磨選
充南臺掾改湖東憲司照磨仍留掾南臺擢海北憲司
經歷遷河南憲司經歷拜南臺監察御史轉河南江浙
兩行省員外郎江浙未赴改南臺都事入為中書右司
都事拜內臺監察御史將進臺都事力辭出為山南浙
西兩道肅政廉訪副使復被選為臺都事俄出為淮東
道肅政廉訪使陞廣西道肅政廉訪使移江東道肅政
廉訪使召拜刑部尚書尋歸休于家起為江南諸道行

御史臺治書侍御史陞侍御史積階中奉大夫公敷歷
臺省誅咎四方出處偉節規撫古人初掾桂臬訪故父
旅殯行諸蒼梧即投檄辭歸以申情事孝節著聞見器
諸老厥後宦業浸盛受知文皇主畫中臺上所親擢侍
燕內廷鬚髮盡白或謂公老上曰傳之在南臺已然此
正老成可用之日也公被眷遇知無不言進退有度縉
紉則之移疾告歸上弗能強廣右之命公去留之疾愈
治行益用見信及以秋官召還文皇賓天遭時多艱大
獄屢起語連宗親公公正不撓刑無濫施事定勇退論
公生平忠孝大畧於此槩見所至蒞政詳明用法矜恕
挺囚滕梧冠黃京夫脅愚民為亂有司坐首從皆死公

誅渠魁四人餘四十二人免家屬論徙遼陽肇州公謂
驅炎墟之民居沍寒地名爲臧死實寘死地請留嶺南
屯田全者六百餘口讞獄閩浙言海寇初皆王民身陷
惡地無由自新宜許以貰罪復業後用其言盜皆爲農
河決大梁城門不開公按視得高陵撤相國寺朝元宮
木爲橋百餘丈道民循城顛行薪米不絕比屋乃炊河
決小黃村陳顥千里皆沒公督有司盡力隄閉河復故
道流離日還淮東大饑勸分維揚一日得楮幣十五萬
八千八百餘緡所賑以戶會三十一萬三百有畸以口
計一百一十四萬一千八十故公政叢發軔海嶠振于
河唯由平反恤災之功居多至於吏能則在中書右司

兩月掾屬心服其竄正吏牘運筆如飛造次之間辭理俱暢在刑曹半年滯事悉決乃定遇革刑制七十六款頒示天下無復質疑公處寮案退然一儒未嘗少自銜徼獨善善惡惡無所避覲在河南時薦前憲使韓從益行省郎中納麟等二十七人為刑臺御史薦浙西憲使許思敬戶部尚書康里回河南行省員外郎胡彞等五十五人乞召還敢諫御史李謙亨成珪於竄所乞叙用故臺臣益陵真中丞苗侍御等八人於家劾前中書左丞黨附權臣暴斂為虐劾河南行省叅政徃括田江西橫斂府縣激變為廣右掌政能制僉憲不敢為苛為南臺懷賓力斥中丞繩下之酷為荆憲黜賍吏三百九十

八員汴蒙古都萬戶畜臣契納豕肝肺芻人腹中習契
咥人軍士忤已輒嗾殺之公正其罪江陵豪僧謀人获
圉証以殺三僧焚之置三豕心燼中為驗公辨其詐抵
僧罪釋無辜二十一人湖廣辨章征徭惟怯公奏罷之
古縣戍將據校官毀宣聖像公定罰錮之海南其効閩
憲聲跡兩使者望風解印嘗不就江西行省辟掾時相
為之慚色自居下僚比至要塗論事英發往往洞識治
體至大中陳革弊防姦戢貪除暴等十事又言六品以
下封妻不及父母非人子志後封贈倏罷又力請復之
延祐中請置東宮弘文館選端人為宮教博士講六經
以輔儲德又請除處戶糧置迤北沁河倉儲節臺中罰

布之用以助賑濟權古今錢幣之制以便小民至順中
言盜駝馬牛羊罪當為等差百官名在罪籍不宜晉該
恩澤或至再叙侍文皇清燕密上封事其目曰明人倫
序宗族命賢相慎殺戮義取仁守保全功臣貶酒闌色
親忠遠倭儒臣進讀宜講帝王之道勿事浮靡罪人妻
孥分賜臣下宜別宗親以存上下之分皆稱上旨凡所
建明咸以著為令或遇布政輒在議中其惠利久遠若
築堤海康闢田萬頃以徠海外耕民海北民鬻食益又
輸鹽丁錢公奏弛其征文皇居潛瓊筦以是知公疾革
猶索紙筆作遺表欲有所陳未成而薨年六十有九曾
祖鑑宋宣教郎祖景高宋韶州通判贈嘉議大夫禮部

尚書上輕車都尉追封彭城郡侯父重坤贈中奉大夫
四川等處行中書省叅知政事護軍追封彭城郡公娶
毛氏繼娶王氏皆先公卒並追封彭城郡夫人再娶張
氏三子長孝友承事郎岳州路經歷公未寢疾奉命展
省先塋聞計得疾後公六十一日卒次孝敬登仕郎永
州路知事辟湖廣省掾史次孝恭廣西道宣尉司照磨
女五長適江西鄉貢進士張仁偉次適伯顏次適卜德
生次適孟坤次適歐陽忠皆士族孫男四好禮好義
好信苟兒孫女三觀音奴觀奴永安奴公博學強記淹
貫經史以禮部公號雪界因號雪峰以志蜀土有奏議
詩文若干卷傳于世早從涿郡盧公處道學詩擅名古

體盧公憲湖南嘗語人曰錡掾傳之天資高邁他日綱
維風憲必斯人也及公為臺端衆咸以為知人玄先君
子內翰公於錡公契友玄辱知尤深在冑監時嘗遣子
孝恭受業館下誼不得辭乃叙而銘之辭曰溫溫劉公
如王不瑕臨事決義蹇蹇法家以儒發身以學施政措
為治才著為辭令惓惓告君懇懇許國寧有風紀我扶
我植自厥筮仕奮由承掾迄其懸車終始司憲入也獻
替出也咨詢官之準人邦之蓋臣文皇知公字而不名
雖閔勞勤實仗老成上飲公醇公疾弗勝有轂有核賜
以豆登丹頰白鬚拜起給扶尚竭心智載陳謀謨秋官
予環廷出綴衣有執國柄赫赫作威公職司平獨立無

悚止辟不淫展也仁勇卜居長沙謝事建鄴輕舟來歸
賦詠盈篋胡不百年為國著龜明禋召從疑事就諮蒲
輪未臻榆沈斯作葵以公輔率履無忤子孫誵誵世被
德馨節惠有典祇此貞銘

元贈從仕郎吉安路吉水州判官周君潛心墓
碑銘

安成周君潛心卒之五十九年以子貴有卹典於朝將
錄其副以告墓次其孫絢奉其宗人南瑞所狀行來京
師謁銘於予維周氏姬姓歷秦涉漢初至三國兩晉多
名臣載史傳唐季有諱璟亦有聞當時其四世孫威避
難遷金陵威子矩仕南唐至御史壻楊竦為吉州刺史

矩至吉因家焉二子長翰次羨羨登宋建隆間第積官
光祿大夫卒贈僕射又遷屬邑之西昌其族蕃衍科第
相望部使者號其里曰爵譽羨子廷訓仕至供奉廷訓
子昭為江陵令卒贈殿中丞有五子次子大理評事中
師生虔化少府壽之壽之子情遷安成之後林里又四
世為潭州通判士貴士貴子人望人望子繼祖是為周
君之父君諱晞顏初字景顏後字潛心自童丱器如成
人年十有六喪父內保家訓外親良師友奮自樹立稍
長脫去拘攣識趣軒朗舉措不擾才力恢恢至元丙子
江南初內附官府易置世務方殷故宋吏胥挾文為姦
里無賴又為囊橐善良重足而立君以孤遺出應門戶

機警辨惠果決有謀既足自彊又能為姻族鄉井捍禦
外侮衆皆倚之為安兄志伊蚤世君撫其孤不翅已子
先業粗給君善經理遂至贏餘推其所有輒濟貧乏惟
浮靡虛誕之士雖數干請秋毫不可得居鄉善善惡惡
子敎不偏訴訟有未之有司而先質正於君省陳義秉
法而劈析之咸得肯綮當俗為息江西行省郎中杜仲
寬聞君之賢方薦君進用俄抱病歸未幾卒于家年裁
三十有三初娶王氏先三年卒再娶觀溪劉氏五年而
君卒初鐺氏之祖母亦蚤寡以貞節聞辛勤教子後皆
擢科湖南轉運司帳管斗則劉氏諸父南康主簿玖則
其父也鐺氏在閨門時習聞劉母懿範故能守節自誓

又能以教子為先務次子遺腹所生日抱之泣行道聞而哀之君柩久在棧不葬人問之曰吾婦人安曉葬書俟吾兒長自卜其地且朱三人守此柩日夕與俱猶同返窀穸也遣子就學歲時從師之禮無闕否則質簪珥以繼二子感激孝養倍至學殖日勤今皆成立長教用憲司試為瑞金縣儒學教諭陞吉安路學正借注廣州新會縣藥徑砦巡檢辟廣東元帥府令史從元帥平循潮二州寇有功遷桂陽路總管府知事有政績湖南憲課其最嘗平反死囚二人及去官為立生祠歷兩考進階從仕郎贛州錄事次恒以儒推擇為臨江贛兩路掾歲滿為上猶縣典史教仕至七品君得贈官其配亦追

封宜人君卒以至元戊子六月十有四日葬以大德庚子十月十有九日墓在州北清化鄉鄴城里鍾氏卒以奉定丁卯四月十有九日年二十有七失所天六十有六而終塋以至正辛巳十二月十有七日墓在新樂鄉之山塘村姑李氏阡女一人王氏出適進士彭躍龍子務德孫男四人絃絢浩澄孫女三人曾孫七人君初失父遭時孔艱及其自立涉世又殘而鄉曲之譽流芳無窮歿世之後家有節婦門有孝子克亢取宗子官業日盛國家飾慎終追遠之惠方來未涯是宜有銘銘曰行以集義僅施于鄉為善竭力得年不長數有乘除分有豐嗇已播弗獲後人是食趙祚既訖君方弱冠家緒不

盡君植之幹若負奇氣不為俠資救難則勇恤孤則慈
視前斯振顧後斯盡年不滿德君子是悼有婦誓節志
不負君有子力學底績于文生也曠遼一命若訥贈恩
便蕃子仕方進有源斯委孰禦其沛博史作銘以訓未
艾

元贈奉議大夫樞密院判官驍騎尉追封浦江
縣子鄭府君墓碑銘有序

大江之南淞河之東有州婆有縣浦江有旌表家鄭氏
九世同爨朝廷嘉而旌之至是又有贈典告于其家是
為樞判府君由其子深起家為右丞相大傅府長史階
正六品初贈國子監丞及深遷宣文閣鑒書博士階正

五品當進贈其親故府君有是命也府君諱銳字景敏其先榮陽人十一世祖曰熒道遷歙歙道子自牖遷睦之淳安自牖之孫淮遷浦江淮樂善好施宋靖康年饑鬻田千餘畝以賑其里人號所居曰仁義里淮之孫曰綺號冲素處士事二親盡孝父照忤時貴得罪文以重辟綺上書郡守錢端禮乞代父坐法守為之直其父冤母張病痺手足皆廢三十餘年九就便液綺必抱持其主家政歲入絲粟不私鄭氏九世不異財實自綺始綺之玄孫龍游丞德珪青田尉德璋尤篤友誼怨家以死中璋法當逮維楊珪請于有司以身代璋行竟死逮所珪子文嗣璋子文泰皆克紹一門薪餐食指數百如出